

Morning Regional Dogri News Bulletin, 21 August 2024

Headlines

- 1- जम्मू-कश्मीर दियां फाइनल मतदाता सूचियां जारी, मतदाताएं दी गिनतरी बधिए 88 लकख 3 जहार होई गई ऐ।
- 2- विधानसभा चुनाएं दे पैहले गेड़ लेई अधिसूचना जारी, इस गेड़ तैहत वोट 18 सितंबर गी पोआए जाडन।
- 3- राजौरी जिले च जिमी हेठ बनाए गेदे आतंकवादिएं दे इक ठकाने गी तबाह कीता गेआ।
- 4 सेहत ते मेडिकल शिक्षा मैहकमे दे सचिव, डॉ. आबिद हों मंकीपाँक्स दे खतरे कन्ने निब्बड़ने लेई सेहत एजेंसिएं दिए तैयारिएं दी समीक्षा कीती।

<><><><><><>

Final-Voter

केंद्र शासित प्रदेश च मतदाताएं दी गिनतरी च 93 जहार थवां मते दा बाददा होआ ऐ। एहदे अलावा प्रदेश च मतदान केंद्रें दी गिनतरी च बी 209 दा बाददा होई गेआ ऐ। आकाशवाणी जम्मू संवाददाता दी रिपोर्ट मुजब मतदाताएं दे फोटू लग्गी दी मतदाता सूचि दा कम्म सफलतापूर्वक सारे 20 जिलें च करी लैता गेआ ऐ ते खीरी मतदाता सूचिएं गी जारी कीता गेआ। एहदे लेई क्वालीफाई तरीक पैहली जुलाई 2024 रक्खी गेदी ही। एहदे तैहत सारे योग्य मतदाताएं दे नाएं गी जिंदी बरेस 18 बरे होई गई ऐ, गी सूची च शामिल कीता गेआ ऐ। विशेष नजरसानी आली कार्रवाई तैहत योग्य मतदाताएं दे नां शामिल कीते गए, गलतिएं गी ठीक कीता गेआ ऐ ते नेह होर कम्में कारवाइएं गी अंजाम दिता गेआ। कुल मतदाताएं दी

गिनतरी 88 लकख 3 ज्हार होई गई ऐ। इंदे च 44 लकख 89 ज्हार मर्द, 43 लकख 13 ज्हार महिलां, 168 थर्ड जेंडर मतदाता न। इस बारै गल्ल करदे होई प्रदेश दे मुख चुनां अधिकारी पी.के पोले होरें आखेआ जे 18 थवां 19 बरे दे युवा मतदाताएं दी गिनतरी च 45 ज्हार 964 दा बाद्दा होआ ऐ। इंदे च 24 ज्हार 310 महिलां न। उनें आखेआ जे 18 थवां 29 बरे तगर दे युवा मतदाताएं दी कुल गिनतरी 25 लकख 34 ज्हार ऐ। एहदे अलावा मतदान केंद्रें दी गिनतरी 11 ज्हार 629 थवां बदिऐ 11 ज्हार 838 होई गई ऐ।

<><><><><><>

ECI-Notification

भारती चुनां आयोग नै जम्मू-कश्मीर च होने आले विधानसभा चुनां दे पैहले गेड़ लेई कल अधिसूचना जारी करी दिती। अनंतनाग, पुलवामा, रामबन ते किश्तवाड़ दे 24 विधानसभा हल्कें च पैहले गेड़ तैहत मतदान होना ऐ। बाकी रौहंदे विधानसभा हल्कें लेई दुए ते त्रीए गेड़ च मतदान होग। जारी अधिसूचना मुजब नामांकन भरने दी खीरी तरीक 27 अगस्त 2024 ऐ। नामांकन पत्रें दी जांच 28 अगस्त गी कीती जाग। मेदवार जेकर चाहन तां 30 अगस्त 2024 तगर अपना नां वापस परताई सकदे न। इनें विधानसभा हल्कें लेई 18 सितंबर गी मतदान होना ऐ। मतदान बड़डलै 7 बजे थवां संझा 6 बजे तगर होग।

<><><><><><>

Hide-Out

सुरक्षाबलें राजौरी जिले च आतंकवादिएं दी छप्पने आहली इक थाहर दा पता लाइए उसी नष्ट करी दिता ऐ। पुलस, सेना ते सीआरपीएफ दे सांझे गशती दल गी दरहाल इलाके दी घेराबंदी करिए चलाए गेदे तपाशी अभियान दौरान एह थाहर लब्बी जित्थे रोजमर्रा दियां चीजां खरी मती गिनतरी च मौजूद हियां जेदे च रूट्टी पकाने आली रसोई गैस, कंबल ते भांडे वगैरा शामिल हे। उयां इस कार्रवाई दौरान कुसै गी बी गिरफ्तार नेई कीता गेआ ऐ। तपाशी अभियान थ्वां पैहले गै आतंकवादी उत्थुआं नस्सी गेदे हे। सुरक्षाबलें उधमपुर जिले दे बसंतगढ़ दे बलोथा इलाके थ्वां गुफा आला लेखा थाहर दा पता लाइए उसी नष्ट करी दिता। उत्थुआं बी खाने-पीने आली किश चीजें गी बरामद कीता गेआ ऐ।

<><><><><><>

CS

मुख्य सचिव अटल डुल्लू होरें कल सिविल प्रशासन ते पुलस मैहकमे दे अफसरें कन्नै बैठक लाई ते विधानसभा चुनाएं गी रमानदारी कन्नै करोआने लेई सुरक्षा बंदोबस्तें दा जायजा लैता। मुख्य सचिव हारें मुतल्लका डिविजनल कमिशनरें, डिप्टी कमिशनरें ते ट्रांसपोर्ट मैहकमें दे अधिकारिएं कन्नै बैठक लाई ते उंदी तैयारिएं ते योजनाएं बारै गल्लबात कीती। मुख्य सचिव होरें प्रशासन गी चुनां लड़ा रदे मेदवारें दी सुरक्षा ते उंदे लेई होरनें सरबंधी इंतजामें दा जायजा लेता। उनें नेह लोकें लेई लोइचदे इंतजाम करने लेई गलाया। उनें इस भेठा हर रोज रिपोर्ट जमा करोआने लेई बी हिदायत कीती।

<><><><><><>

BJP-J&K

बीजेपी नै आँदे जम्मू-कश्मीर विधानसभा चुनांस लेई चुनांस प्रभारी पार्टी दे नेता राम माधव ते केंद्री मंत्री जी किशन रेड्डी हों गी नियुक्त कीता ऐ। केंद्र शासित प्रदेश च चुनां 18, 25 सितंबर ते 1 अक्टूबर गी होंगन।

<><><><><><>

DIRP-Udhampur

सूचना ते जन संपर्क मैहकमे दे उधमपुर केंद्र आस्सेया कल मकामी केबल आपरेटरें कन्नै इक बैठक लाइयै उनेंगी भारतीय चुनां आयोग आस्सेया आँदे विधानसभा चुनाएं दे बारे च इलेक्ट्रानिक ते प्रिंट मीडिया लेई जारी दिशा-निर्देशों दे बारे च अवगत कराया गेआ। उनेंगी खरी चाल्ली समझाया गेआ जे आदर्श आचार संहिता दे चलदे उन्दे केबल नेटवर्क राएं केह किश प्रसारित कीता जा नेई कीता जाना लोड़चदा। जिला सूचना अुसर राजिंद्र कुमार डिग्गरा हों चुनां आयोग दे दिशा-निर्देशों दी सख्ती नै पालमा कीते जाने पर जोर दिता। उनें आखेआ जे आचार संहिता दी कुसै बी चाल्ली दी कोई अनदिकखी जां खलाफवर्जी नेई होए ते चुनां पूरी चाल्लीं साफ-सुथरे ढंगगै नै तोड़ी चढ़ी सकन।

<><><><><><>

ते हुन बाकी दिएं खबरें कन्नै जगमोहन शर्मा।

Monkey-Pox

ेहत ते मेडिकल शिक्षा सचिव डॉ. सईद आबिद रशीद शाह हों विश्व सेहत संगठनें आस्सेया मंकी पाक्स गी हाल च घोषित कीती गेदी इमरजेंसी मगरा जम्मू-कश्मीर च एहदी तैयारिएं बारै

जायजा लेता। बैठक दौरान सचिव हों सारे सरबन्धी धड़ें गी हिदायत कीती जे ओह लोडचदे एहतियाती हीले अपनान तां जे कुसै बी स्थिति कन्नै निब्बड़ेया जाई सकै। उनें सब्बनें सरबन्धी प्रमुखें गी आखेआ जे ओह प्रदेश च अभ्यास सरबन्धी मॉक ड्रिल करन ते सारे सेहत अफसरें गी लोडचदी सरबन्धी सिखलाई बी देन। उनें इस कम्मै आस्तै सेहत इदारें च बक्खरे वार्ड कायम करने लेई बी आखेआ। बक्ख-बक्ख मैहकमें दे प्रमुखें गी आखेआ गेआ ऐ जे ओह लोडचदे समेयान ते दोआइए वगैरा बारै स्थिति दा जायजा लैन ते जरूरी चीजें दी दस्तेयाबी बनाई रक्खन तां जे लोड पौने पर कुसै बी स्थिति कन्नै निब्बड़ेया जाई सकै।

<><><><><><>

DEO-Doda

डोडा दे जिला चुनां अफसर हरविंद्र सिंह हों कल इक्क जायजा बैठक सददिए औंद विधानसभा चुनां गितै तैयारिएं दी समीक्षा कीती। बैठका च चुनां करोआने गी लेइए तैयारिएं दे बक्ख-बक्ख पैहलुएं पर तफसीली सोच-विचार कीता गेआ जिंदे च चुनां अमले दी तैनाती, सुरक्षा बंदोबस्त, मतदान केंद्रें पर जरूरी सेवाएं सुविधाएं दे बंदोबस्त ते बक्ख-बक्ख मैहकमें बश्कार आपूं च तालमेल वगैरा शामिल रेह। अधिकारिएं गी निर्देश दिते गे जे ओह अपने-अपने इलाकें च चुनां सरबन्धी ड्यूटिएं दे बारे च पूरी रिपोर्ट तैयार करियै रक्खन तां जे एह पैहले गै यकीनी बनाया जाई सकै। बैठका च इस गल्लै पर चेचे तौरा पर जोर दित्ता गेआ जे भारतीय चुनां आयोग दे दिशा-निर्देशों मुजब आदर्श आचार संहिता दी सख्ती नै पालमा कीती जा।

<><><><><><>

DEO-Reasi

रियासी दे जिला चुनां अफसर विशेष महाजन होरें कल बक्ख-बक्ख सियासी पार्टिं दे प्रतिनिधिं दी इक बैठक सददिए उन्दे कन्नै आदर्श आचार संहिता ते भारती चुनां आयोग दे दिशा-निर्देशों दे बारे च उंदे कन्नै तफसीली चर्चा कीती जेदे च टकोहदा करिए सियासी पार्टिं लेई जारी कीते गेदे न। जिला चुनां अफसर होरें जोर देइयै आखेआ जे कोई बी चुनां रैली चुनां कार्यक्रम लाउड स्पीकर लाने कोला पैहले बाकायदा परमिशन लेई लैती जा। उनें आदर्श आचार संहिता दी सख्ती नै पालमा करने पर जोर दिंदे होई आखेआ जे इयां करने कन्नै साफ, पारदर्शी, सुतंत्र ते निरपक्ख चुनां यकीनी बनाया जाई सकदा ऐ। उनें आम लोकें अग्गे बी अपील कीती जे ओह् बधी-चढ़िए मतदान करन।

<><><><><><>

DEO-Udhampur

उधमपुर दिं जिला चुनां अफसर सलोनी राय होरें कल उधमपुर दे सरकारी महिला कालेज दा दौरा कीता ते उत्थे बनाए जाने आले मतदान गिनत्री केंद्र ते स्ट्रांग रूम गितै तैयारिं बवस्थां दा निरीक्षण कीता। औंदे विधानसभा चुनां गितै तैयारिं दा जायजा लैने दे सिलसिले च दौरे पर गेदिं जिला चुनां अधिकारी होरें आखेआ जे इस दौरे दा मकसद इस गल्लै गी यकीनी बनाना हा जे शुरू कोलां लेइए खीरै तोड़ी चुनां दियां तैयारियां पूरी चाल्लीं चुस्त-दरुस्त बनी दियां रौहन ते कुसै बी चाल्लीं दी कताही जां कमी पेशी दी गुंजैश नेई रवै ते चुनां पूरी चाल्लीं साफ-सुथरे रमानदारी ते बवस्था आले ढंग्गै सिर तोड़ चढ़ना यकीनी बनी सकै।

<><><><><><>

Nodal-Officer

डी.सी दफ्तर पुंछ च कल असैम्बली हल्के ते जिला सतह दे रिटर्निंग अफसरें लई इक व्यापक सिखलाई सत्र दा कामयाब सरिस्ता कीता गेआ। इस आयोजन दा मकसद रिटर्निंग अफसरें गी चुनां प्रक्रिया सरबंधी अपनिएं जुम्मेवारिएं गी पूरी चाल्ली ते असरदार ढंगे सिर निभाने लेई तैयार करना हा। इस मौके मास्टर ट्रेनरें उनेंगी पूरी चुनां प्रक्रिया ते बवस्थाएं दे बारै च तफसीली जानकारी ते सिखलाई दिती। इस दौरान वोट पाने दा झूठे-मूठे दा भ्यास बी कीता गेआ। वोटिंग मशीनें दी बरतून किस चाल्ली करनी ऐ केहड़े-केहड़े नियमें ते प्रक्रियाएं दी सख्ती नै पालमा किस चाल्ली करनी ऐ, इस बारै बी जानकारी ते भ्यास उनेंगी कराया गेआ।

<><><><><><><><>

Reasi-Admin

रियासी दे जिला प्रशासन नै कल पुलसै गी आखेआ जे ओह जम्मू-कश्मीर औंदे विधानसभा चुनां दी घोषणा दे बाद लागू आदर्श आचार संहिता दी असरदार ढंगे सिर अमलावरी गी यकीनी बनाने च सहयोग देयै ते कन्ने इस सरबंधे च लसैसी थेआर जमा कराने दी प्रक्रिया च बी मदद करै। जिले दे एस.डी.एम-एं ते तहसीलदारें गी आक्खी दिता गेदा ऐ जे ओह अपने-अपने इलाकें च इनं हुक्में दी तामील यकीनी बनाने लेई इंदा बड्डे पैमाने पर प्रचार करन तां जे लोकें समें थेआर प्रशासन कश जमा कराई देन। उआं बैंकें, एटीएम-एं, रेलवे कंपनिएं वगैरा पर ड्यूटी देने आले सिक्योरिटी गार्डें पर एह हुक्म लागू नेई होगा।

<><><><><><><><>